

Diadomingo dia 18 di september lo haci un recorrido den pasado di San Nicolas

Algun cupo so a resta riba bus pa Expedicion Arkeologico 2016



DIALUNA a habri inscripcion p'e Expedicion Arkeologico 2016 y di biaha interesadonan a cuminsa yama Museo Arkeologico pa inscribi p'e recorrido riba bus of pa haya mas informacion con pa bishita e sitionan arkeologico cu nan propio transporte riba diadomingo dia 18 di september entre 10'or di mainta pa 1'or di merdia.

E Expedicion Arkeologico ta ser ofreci gratis na participantenan y ta den cuadro di luna di Monumento.

E area di San Nicolas tin un historia valioso, tanto di e periodo Amerindio como di e periodo historico di Aruba. Pa e expedicion di e aña aki lo bishita e sitionan arkeologico di Manzanilla, Banki Jerome y na Collony/ Rodgers Beach. Durante e recorrido lo tin expertonan sea di Monumentonan di Aruba, e historia di Industria di Aruba, Cultura y mas riba cada bus.

E aña aki lo colabora un biaha mas cu Stichting Monumentenfonds, pero tambe cu Fundacion Museo Arubano cu dialuna anochi a habri e Museo di Industria na e Watertoren di San Nicolas y e Museo di Comunidad na San Nicolas Store, cual ambos lo forma parti di e recorrido den pasado na San Nicolas.

Alaves Museo Arkeologico a haya colaboracion di Stichting Rancho pa cual Museo tambe ta hopi agradici. Participantenan di e proyecto existoso "Tempo pa Click" lo documenta e expedicion arkeologico 2016.

E proyecto Tempo pa Click tin como meta pa duna residentenan di Rancho e oportunidad pa expresa y refleha riba nan experiencia bibando den Rancho y e asuntonan social presente den e barrio dor di uzo di fotografia.

Stichting Rancho a organisa e proyecto na 2015 y 2016 pa potret y film. Documentando e Expedicion Arkeologico ta duna e participanten e oportunidad pa keda desaroya y promove nan mes den fotografia.

Pa mas informacion trocante e proyecto exitoso aki por subi <https://www.facebook.com/tempopaclick/>

Pa participa na e Expedicion Arkeologico mester registra pa reserva cupo rib'e bus.

Pa haci esaki por yama Museo Arkeologico na 582-8979 y puntra pa Cristy Werleman.

Tambe ta posibel pa haci un dushi recorrido cu propio transporte cu famia y amigonan.

Yama Museo pa mas informacion di e ubicacion di e sitionan unda e arkeologo y asistente di arkeologo lo ta presente diadomingo dia 18 di september entre 10:00am pa 1:00pm pa duna tur bishitante e dia aki informacion di e lugarnan aki cu ta asina valioso pa nos herencia cultural.